

ANCHEUJ, DISSÈT D'AVRIL

A pieuv.
A pieuv 'n sël pont vej 'd San Mò.
A pieuv 'n sl'eva grisa dël Pò.
As verso sèbbrà d'eva frèida,
A rivo sabrà 'd vent ch'a gèila.
A pieuv 'n sël pont vej 'd San Mò
A pieuv 'n sl'eva grisa dël Pò.

A piora.
A piora 'l cel nèir sù San Mò.
A piora e a sè specia ant ël Pò.
A l'é nè sgrondé 'd mila stiss,
A l'é nè sgruné 'd gran-e 'd ris.
A piora 'l cel neir sù San Mò.
A piora e a sè specia ant ël Pò.

A fiòca.
A fiòca an colin-a a San Mò.
A fiòca an sle rive dël Pò.
A svanto ij fiòch còti mè lan-a
A j'armès-cia la tramontan-a.
A fiòca an colin-a a San Mò.
A fiòca an sle rive dël Pò.

“Al dissèt d'Avril?! Ma i schersoma?
Ant ël temp ëd la Prima i soma!”

“Ma dai! Varda bin an sël Pò,
Adess, dal pont vej 'd San Mò!”

A vòlo!
A vòlo ij rondon a San Mò!
A vòlo ij rondon an sël Pò!
A sfriso la diga e 'l pont vej,
A sè sfrando rasent ai rastej,
A sghijo giù d'ala e a s'ardrisso,
A smija ch'a gieugo e ch'as cisso,
A s'àuusso, a s'ancrosio d'amblé,
A sè sbasso l'eva a sfioré.
Ant l'aria a l'é tut un gasoj,
An cel a l'é tut un garboj.

A-i é pro la Prima an sël Pò!
A-i é pro la Prima a San Mò!